

आकाशवाणी जयपुर-अजमेर  
प्रादेशिक समाचार ।  
दिनांक 05.06.2024  
समय: 18.45 बजे

- प्रधानमंत्री नरेन्द्र मोदी इस्तीफो दीनो-राष्ट्रपति द्रौपदी मुर्मू वां ऊं नुवी सरकार बणबा ताई ओहदा माथे बण्या रेहवण सारू कह्यो ।
- केन्द्र मांय नुवी सरकार बणावण रा बारा मांय विचार करण सारू आज नई दिल्ली मांय एनडीए मांय शामिल पार्टियां रा नेतावां री मीटिंग व्ही ।
- विश्व पर्यावरण दिवस रे मौके प्रदेशभर मांय जागरूकता कार्यक्रम राख्यी ज्या- राज्य मांय पर्यावरण ने बचावण सारू 'मुख्यमंत्री वृक्षारोपण महाभियान' सारू करी ज्यो
- देश मांय साल 2023-24 मांय खाद्यान्न उत्पादन तीन हजार दो सौ 88 लाख टन ऊं बत्तो व्हेवण रो अनुमान ।

000

प्रधानमंत्री नरेन्द्र मोदी आज राष्ट्रपति द्रौपदी मुर्मू सागे मुलाकात कर र वां ने केंद्रीय मंत्रिपरिषद रो इस्तीफो सूप दीनो । राष्ट्रपति इण ने मंजूर कर लीनो । वे नुवी सरकार बणबा ताई प्रधानमंत्री अर केंद्रीय मंत्रिपरिषद ऊं सरकार चलावण बाबत् कह्यो । प्रधानमंत्री नरेन्द्र मोदी आज उपराष्ट्रपति जगदीप धनखड़ सागे ई मुलाकात कीनी ।

00000

नई दिल्ली मांय निवर्तमान प्रधानमंत्री नरेन्द्र मोदी रा रेहवास परां आज एन डी ए मांय शामिल पार्टियां रा नेतावां री मीटिंग राख्यी ज्यी । मीटिंग मांय नरेन्द्र मोदी री अगुवाई मांय लगातार तीजी दफा सरकार बणावण माथे विचार करी ज्यो । मीटिंग मांय एन. डी. ए. रा नेता नरेन्द्र मोदी ने एक राय ऊं एन. डी. ए. रा नेता चुण लीनो । तेलुगूदेसम पार्टी रा मुखिया एन चंद्रबाबू नायडू, जनता दल युनाइटेड रा मुखिया अर बिहार रा मुख्यमंत्री नीतीश कुमार अर लोकजन शक्ति पार्टी (रामविलास) रा मुखिया चिराग पासवान समेत एनडीए मांय शामिल पार्टियां रा नेता मीटिंग मांय मौजूद रह्या ।

00000

लोकसभा चुनाव मांय राज्य रा पांच विधायक ई जीत हासिल कीनी । अब वां रा विधानसभा हलकां मांय उप चुनाव कराया जावण री जरूरत व्हेला । चौरासी विधानसभा हलका ऊं भारत आदिवासी पार्टी रा

राजकुमार रोट, दौसा ऊं कांग्रेस रा मुरारी लाल मीणा, उनियारा ऊं कांग्रेस रा हरीश चन्द्र मीणा, खीवसर ऊं राष्ट्रीय लोकतांत्रिक पार्टी रा हनुमान बेनीवाल अर झुन्झुनू ऊं कांग्रेस रा विधायक बृजेन्द्र ओला लोकसभा चुनाव जीत र सांसद बण ग्या है। ऐ सगळा लारला साल रा आखिर मांय व्ह्या विधानसभा चुनाव मांय विधायक चुणी ज्या हा।

00000

प्रदेश मांय स्वास्थ्य सेवावां ने आर्टिफिशियल इंटेलीजेंस आधारित तकनीकां ऊं और मजबूत बणायी जावेला। ई सारू चिकित्सा शिक्षा विभाग रा अहलकारां रो एक दल ईलाज रा हलका मांय व्हे रह्या नवाचारां अर तकनीकां री जाणकारी लेवण सारू 6 अर 7 जून ने नई दिल्ली रा अखिल भारतीय आयुर्विज्ञान संस्थान (एम्स) रो दौरा करेला। चिकित्सा शिक्षा विभाग री अतिरिक्त मुख्य सचिव शुभ्रा सिंह ई बारा मांय एम्स रा निदेशक ने कागद लिख्यो है।

000

राज्य मांय पर्यावरण ने बचावण सारू 'मुख्यमंत्री वृक्षारोपण महाभियान' सरू करी ज्यो है। मुख्यमंत्री भजन लाल शर्मा आज जयपुर मांय राख्यी ज्या राज्य स्तर रा पर्यावरण दिवस जळसा मांय आ जाणकारी दीनी।

वे बतायो के ई रा तैत चौमासा मांय 7 करोड़ पौधा रोप्या जावेला। ई मौके मुख्यमंत्री कह्यो के कुदरत सागे तालमेल बिठावणो व्हेला। मुख्यमंत्री कह्यो के राज्य मांय बारिश रो पाणी बचावण सारू मुख्यमंत्री जल स्वाबलंबन अभियान 2.0 रा तैत साढे 3 हजार करोड़ रुप्या रा खर्च ऊं पाणी बचावण री 1 लाख 10 हजार संरचनावां बणायी जा रही है। जळसा मांय मुख्यमंत्री जयपुर सारू वायु गुणवत्ता पूर्व चेतावनी प्रणाली लांच कीनी। वे कह्यो के मुख्यमंत्री वृक्षारोपण महाभियान रा तैत रोप्या जावण वाळा 7 करोड़ पौधां मांय ऊं 3 करोड़ पौधा जनता ने सस्ता मुहैया कराया जावेला, जद के 3 करोड़ पौधा सरकारी जमीं माथे अर 1 करोड़ पौधा ओरण अर चारागाह जमीं माथे रोप्या जावेला। वे कह्यो के राज्य सरकार हवा ने गंदी कर्यां बगैर आवण-जावण सारू जयपुर, जोधपुर, उदयपुर अर कोटा सरीखा मोटा शहरां मांय बिजली ऊं चालण वाळी 500 बसां मुहैया करा रही है।

00000

विश्व पर्यावरण दिवस रे मौके प्रदेश मांय न्यारी-न्यारी ठोडां कार्यक्रम राख्यी ज्या। **डीग** रा कलेक्टर रा दपतर ऊं पर्यावरण रा बारा मांय जनता मांय जाग जगावण सारू एल.ई.डी. वैन रवाना करी ज्यी। ई रे मार्फत जनता मांय बत्ता ऊं बत्ता पौधा रोपण सारू जाग जगायी ज्यी। ई मौके पॉलिथीन री थैलियां काम लेवण ऊं रोकण सारू कपड़ा री थैलियां बांटी ज्यी अर कलेक्ट्रेट परिसर मांय वन जल अमृत अभियान रा तैत पौधा रोपी ज्या।

एक कारोबारी संगठन री ओर ऊं पहाड़ी तहसील मांय ई पौधा रोपी ज्या। **झुंझुनू** मांय पर्यावरण जन जागरूकता रैली निकाळी ज्यी अर सूचना केंद्र मांय पौधा रोपी ज्या। ई मौके मौजूद लोगां ने पर्यावरण ने बचावण री सौगंध दिरायी ज्यी। **पाली** मांय संभागीय आयुक्त प्रतिभा सिंह वां रा दपतर मांय परिंडा लगाया। जिला रा सोजत उपखंड हलका मांय बस स्टैंड माथे मानव श्रृंखला बणा र साफ सफाई राखण री शपथ दिरायी ज्यी अर पर्यावरण ने बचावण रा बारा मांय नाटक खेली ज्यो। **केकड़ी** मांय विधायक शत्रुघ्न गौतम पौधा रोप्या। ई मौके वे अहलकारां ने चौमासा ऊं पैली सड़क रे किनारे, पार्का मांय, श्मशान अर कब्रिस्तान मांय अर सरकारी जमीं परां करीब एक लाख पौधा रोपण री योजना बणावण रा हुकम दीना। पर्यावरण दिवस रे मौके भारतीय स्टेट बैंक री कृषि विकास शाखा री ओर ऊं पारा गांव मांय 101 किसानां ने पौधा बांटी ज्या। **भीलवाड़ा** मांय ई प्रशासन अर खुद सेवक संगठनां री ओर ऊं पौधा रोप र पर्यावरण बचावण रो संकल्प लियो ज्यो। **बूंदी** मांय राजस्थान राज्य भारत स्काउट गाइड री ओर ऊं चलाया जा रह्या

कौशल विकास अर अभिरुचि प्रशिक्षण शिविर रा तैत राख्खी ज्या कार्यक्रम मांय रुंखड़ां रा महत्त्व रा बारा मांय जाणकारी दीरीजी अर बत्ता ऊं बत्ता पौधा रोपण बाबत् अरज करी ज्यी। **बाड़मेर** रा सरकारी पी.जी. कॉलेज मांय एन.सी.सी. कैंडेट्स पौधा रोप्या। ई मौके चित्रकला होड़ ई राख्खी ज्यी।

**करौली** मांय राजस्थान राज्य भारत स्काउट अर गाइड री ओर ऊं राजकीय बापू उच्च प्राथमिक विद्यालय मांय राख्खी ज्या कार्यक्रम मांय स्काउट रा कार्यकर्तावां ने पांच-पांच पौधा रोपण री सौगंध दिरायी ज्यी। **अलवर** मांय अहलकारां री ओर ऊं पौधा रोपी ज्या। **जैसलमेर** मांय जिला विधिक सेवा प्राधिकरण री ओर ऊं ए.डी.आर. सेंटर मांय पौधा रोपी ज्या अर सफाई अभियान चलायी ज्यो। वटे भारतीय वायुसेना स्कूल रा खेल मैदान मांय पौधा रोपी ज्या। **टोंक** मांय पर्यावरण ने बचावण रा बारा मांय विचार गोष्ठी राख्खी ज्यी। भारत स्काउट गाइड री ओर ऊं पर्यावरण ने बचावण रा बारा मांय निबन्ध, पोस्टर, अर प्रश्नोत्तरी होड़ राख्खी ज्यी। **डूंगरपुर** मांय मनरेगा रा तैत बणायी ज्या अमृत सरोवर माथे खास कार्यक्रम राख्खी ज्यो। वटे महारावल राजकीय उच्च माध्यमिक विद्यालय मांय प्रश्नोत्तरी अर चित्रकला होड़ राख्खी ज्यी अर जिला कलेक्टर री अगुवाई मांय पौधा रोपी ज्या। ई मौके कपड़ा री थैलियां अर तुलसी रा पौधा बांटी ज्या। **प्रतापगढ़** मांय जिला कलेक्टर पौधा रोप्या अर पंछियां सारू परिंडा बांध्या। **भरतपुर** रा सरसों अनुसंधान निदेशालय मांय राजस्थान जैव विविधता बोर्ड री ओर ऊं संगोष्ठी राख्खी ज्यी अर पौधा रोपी ज्या। **नागौर** रा पशु मेला मैदान मांय सामाजिक संगठनां री ओर ऊं 101 पौधा रोपी ज्या। **बांसवाड़ा** रा रिजर्व पुलिस लाईन परिसर मांय पौधा रोपी ज्या। **जयपुर** रा पीएम श्री केंद्रीय विद्यालय नंबर 2 मांय पौधा रोपी ज्या।

**जोधपुर** रा काजरी परिसर मांय राख्खी ज्या कार्यक्रम मांय पर्यावरण ने बचावण रा बारा मांय बणायी ज्या पोस्टरां रो विमोचन करी ज्यो। **कोटपुतली- बहरोड़** जिला मांय **बेटी पानी पेड़** अभियान सुरु करी ज्यो। ई रा तैत एक लाख पिरवारां ने पर्यावरण बचावण रा अभियान ऊं जोड़ र पौधा रोपी ज्या। राष्ट्रपति द्रौपदी मुर्मू, उपराष्ट्रपति जगदीप धनखड अर प्रधानमंत्री नरेन्द्र मोदी विश्व पर्यावरण दिवस रे मौके जनता ने शुभकामनावां दीनी। प्रधानमंत्री ई मौके **एक पेड़ मां के नाम** अभियान री सुरुआत कर र बुद्ध जंयती पार्क मांय पौधा रोप्या। लोकसभा रा निवर्तमान स्पीकर ओम बिरला संसद भवन परिसर मांय अर दिल्ली मांय वां रा रहवास माथे पौधा रोप्या। ई मौके वे कह्यो के जलवायु मांय बदलाव अर ई कारण उपजा हालात ऊं दुनियाभर मांय चिंता है अर भारत ही ई चुनौती रो सामो करण रो गेलो बतावेला। वे सगळा ऊं पौधा रोपण अर वां री सार-संभाळ करण री अपील कीनी।

00000

सवाईमाधोपुर रा पीएम श्री केंद्रीय विद्यालय मांय इको क्लब रा विद्यार्थियां री ओर ऊं आज मिशन लाइफ सुरु करी ज्यो। 12 जून ताई चालण वाळा ई कार्यक्रम मांय स्वस्थ जीवन शैली, बिजली अर पाणी री बचत अर प्लास्टिक काम लेवण रा नुकसाण रा बारा मांय विद्यार्थियां अर वां रा मायतां ने जाणकारी दी जावेला। कैंप मांय पौधा रोप्या जावेला अर न्यारी-न्यारी होड़ां राख्खी जावेला।

00000

देश मांय साल 2023-24 मांय खाद्यान्न री उपज तीन हजार 288 लाख टन ऊं बत्ती व्हेवण रा आसार है। कृषि मंत्रालय ऊं मिली जाणकारी रे मुजब चावल री उपज एक हजार 367 लाख टन व्हेवण रो अंदाजो है। गेहूं री उपज एक हजार 129 लाख टन ऊं बत्ती व्हे सके है ,जो लारला साल री तुलना मांय 23 लाख टन ऊं बत्ती है। आकाशवाणी सागे बातचीत करता थकां कृषि विशेषज्ञ डॉक्टर संतकुमार चौधरी बतायो के तुअर री दाल री उपज 34 लाख टन व्हेवण रे अंदाजो है, जो लारला साल री उपज ऊं करीब 73 हजार टन बत्तो है।

.....

00000

खराब गुर्दा री ठौड़ सही गुर्दो निकाळबा रा आरोपित डॉक्टर संजय धनखड़ ने झुंझुनूं पुलिस आज गिरफ्तार कर लीनो। एस.पी. राजर्षि राज वर्मा खबरनवीसां सागे बातचीत करता थकां आ जाणकारी दीनी। वे बतायो के पुलिस डॉ. धनखड़ रे खिलाफ धारा 337 अर 338 मांय मामलो दर्ज कीनो हो, पण जांच मांय सामी आयी नुवी जाणकारियां पाछे धारा 420, 465 अर 473 ई जोड़ी ज्यी। एस.पी. बतायो के डॉ. धनखड़ ने अदालत मांय पेश कर र रिमांड माथे ले र गायब व्ह्या गुर्दा रा बारा मांय ई पूछताछ करी जावेला।

00000

राज्य मांय एक और पश्चिमी विक्षोभ रा असर ऊं भरतपुर, जयपुर, कोटा, अजमेर, बीकानेर अर जोधपुर संभाग मांय कठे-कठे बिरखा व्हेवण रा आसार है। ई बीचे प्रदेश रा आतूणी हलकां मांय मौसम सूखो रह्यो, जदके ऊगणी हलकां मांय कठे-कठे बिरखा व्ही, हालांकि जयपुर अर बीकानेर संभाग मांय कठे-कठे लू रा हालात रह्या। घणखर टोडां पारो 42 ऊं 46 डिग्री सैल्सियस बीचे दर्ज करी ज्यो। श्रीगंगानगर मांय रात री बगत ई जोरदार गर्मी रही।

000